



REPUBLIKA E SHQIPËRISË
Kuvendi

PROJEKT LIGJ

Nr. ____ / 2019

PËR

DISA NDRYSHIME DHE SHTESA NË LIGJIN NR.92/2014,
“PËR TATIMIN MBI VLERËN E SHTUAR NË REPUBLIKËN
E SHQIPËRISË”, TË NDRYSHUAR

Në mbështetje të neneve 78, 83, pika 1, dhe 155, të Kushtetutës, me propozimin e Këshillit të Ministrave, Kuvendi i Republikës së Shqipërisë

V E N D O S I:

Në ligjin nr.92/2014, “Për tatimin mbi vlerën e shtuar në Republikën e Shqipërisë”, të ndryshuar, bëhen ndryshimet dhe shtesat, si më poshtë vijon:

Neni 1

Në nenin 51, pas shkronjës “o” shtohet shkronja “p”, me këtë përmbajtje:

“p) furnizimi i automjeteve vetëm me motor elektrik, të reja, me zero km e që nuk janë regjistruar më parë për qarkullim në asnjë shtet tjetër, përveç atyre të përcaktuara në pikën 7, të nenit 49, të ligjit.”.

Neni 2

Në fjalinë e fundit të pikës 2, të nenit 58, fjalët “... e shoqëruar me kuponin tatimor, që vërteton pagesën e kryer, ...” hiqen.

Neni 3

Në shkronjën “b”, të nenit 95, fjalët “... në një format elektronik ...” zëvendësohen me “... në formatin elektronik sipas ligjit për faturën dhe sistemin e monitorimit të qarkullimit.”.

Neni 4

Pika 1, e nenit 96, ndryshohet, si më poshtë vijon:

“1. Faturimi kryhet sipas rregullave të përcaktuara në këtë seksion dhe në ligjin për faturën dhe sistemin e monitorimit të qarkullimit për të gjitha furnizimet e mallrave dhe të shërbimeve, vendi i të cilave, sipas dispozitave të kreut IV, të këtij ligji, është në Republikën e Shqipërisë.”.

Neni 5

Në pikën 2, të nenit 97, fjalia e fundit ndryshohet, si më poshtë vijon:

“Dokumentimi i këtyre transaksioneve bëhet siç përcaktohet nga autoritetet që mbikëqyrin këto lloj veprimtarish, në marrëveshje me autoritetin tatimor, dhe duhet të përmbajë, të paktën, informacionin e mëposhtëm:

- a) datën e lëshimit;
- b) identifikimin e personit të tatueshëm, që furnizon mallrat dhe shërbimet;
- c) identifikimin e mallrave dhe të shërbimeve të furnizuara.”.

Neni 6

Neni 98 ndryshohet, me këtë përmbajtje:

“Neni 98

Të tjera përcaktime mbi faturimin

Përveç sa përcaktohet në nenin 97, personi i tatueshëm duhet të sigurohet për lëshimin e faturës për çdo furnizim tjetër të mallrave ose shërbimeve, pavarësisht vlerës së furnizimit, në përputhje me ligjin për faturën dhe sistemin e monitorimit të qarkullimit.”.

Neni 7

Në pikën 2, të nenit 99, fjalët “... jo më vonë se data 14 ...” zëvendësohen me “... jo më vonë se data 10 ...”.

Neni 8

Në nenin 101 bëhen këto ndryshime dhe shtesa:

1. Shkronja “a” ndryshohet, me këtë përmbajtje:

“a) datën, vendin dhe kohën e lëshimit të faturës.”.

2. Shkronja “b” ndryshohet, si më poshtë vijon:

“b) numrin e faturës, siç përcaktohet në ligjin për faturën dhe sistemin për monitorimin e qarkullimit.”.

3. Pas shkronjës “nj” shtohen paragrafët, si më poshtë vijon:

“Fatura, përveç informacionit të përcaktuar në shkronjat “a” deri “nj”, të këtij neni, duhet të përmbajë edhe elemente të tjera, sipas përcaktimit në ligjin për faturën dhe sistemin e monitorimit të qarkullimit.

Dokumentet e përcaktuara në nënndarjet “i” dhe “ii”, të shkronjës “c”, të nenit 95, të këtij ligji, përveç informacionit të përcaktuar në nenin 101 duhet të përmbajnë referencat e faturës fillestare përkatëse dhe detajet specifike që ato korrigjojnë.”.

Neni 9

Neni 102 shfuqizohet.

Neni 10

Neni 104 ndryshohet, si më poshtë vijon:

“Neni 104

Mënyra e lëshimit dhe e dërgimit të faturave

Faturat tatimore dhe dokumentet e tjera, të lëshuara sipas këtij ligji, mund të vihen në dispozicion në letër ose në formë elektronike, siç përcaktohet në ligjin për faturën dhe sistemin e monitorimit të qarkullimit.”.

Neni 11

Neni 105 ndryshohet, me këtë përmbajtje:

“Neni 105
Kriteret e dërgimit dhe të lëshimit të faturave

Vërtetësia e origjinës, integriteti i përmbajtjes dhe lexueshmëria e një fature, qoftë kjo në letër apo në formë elektronike, duhet të garantohen në përputhje me përcaktimet e ligjit për faturën dhe sistemin e monitorimit të qarkullimit, duke filluar nga momenti i lëshimit të saj deri në përfundimin e periudhës së ruajtjes së faturës.”.

Neni 12

Në nenin 106 bëhen ndryshimi dhe shtesa, si më poshtë vijon:

1. Në pikën 3, fjalët “.., në të cilin parashikohet edhe dërgimi në rrugë elektronike ...” hiqen.
2. Pas pikës 3 shtohet pika 4, me këtë përmbajtje:

“4. Deklarata e TVSH-së, e bërë sipas pikës 1, të këtij neni, do të krijohet automatikisht nga autoriteti tatimor, bazuar në informacionin në librin e blerjes dhe në librin e shitjes. Personi i tatueshëm duhet të kontrollojë të dhënat në atë deklaratë, t’i ndryshojë ose t’i plotësojë ato, nëse është e nevojshme, në përputhje me librin e blerjes dhe të shitjes, të konfirmojë saktësinë dhe plotësinë e tyre, duke përdorur shërbimin elektronik të autoritetit tatimor, dhe ta dorëzojë atë brenda afatit të përcaktuar në nenin 107, të këtij ligji.”.

Neni 13

Në pikën 2, të nenit 109, në fund të fjalisë së parë shtohen fjalët “.., në përputhje me ligjin për faturën dhe sistemin e monitorimit të qarkullimit.”.

Neni 14

Në pikën 1, të nenit 110, paragrafi i dytë ndryshohet, si më poshtë vijon:

“Këta persona, për faturimin i nënshtrohen dispozitave të ligjit për faturën dhe sistemin e monitorimit të qarkullimit.”.

Neni 15

Pika 2, e nenit 157, shfuqizohet.

Neni 16

Dispozitë kalimtare

Në periudhën kalimtare, nga data e hyrjes në fuqi të këtij ligji deri në fillimin e zbatimit të tij, për përdorimin e detyrueshëm të faturave elektronike, siç përcaktohet në ligjin për faturën dhe sistemin e monitorimit të qarkullimit, personi i tatueshëm, për transaksione pa para në dorë me personin tjetër të tatueshëm dhe personin juridik të patatueshëm, duhet:

- a) të lëshojë fatura tatimore me përmbajtjen dhe në formatin në përputhje me nenet 101 dhe 104 të ligjit për tatimin mbi vlerën e shtuar në Republikën e Shqipërisë, sipas përcaktimeve përpara hyrjes në fuqi të këtij ligji;
- b) të dorëzojë deklaratën e TVSH-së në përputhje me nenin 106 të ligjit për tatimin mbi vlerën e shtuar në Republikën e Shqipërisë, sipas përcaktimeve përpara hyrjes në fuqi të këtij ligji;
- c) të dorëzojë librin e blerjeve dhe librin e shitjeve në përputhje me nenin 109 të ligjit për tatimin mbi vlerën e shtuar në Republikën e Shqipërisë, sipas përcaktimeve përpara hyrjes në fuqi të këtij ligji.

Neni 17

Hyrja në fuqi

Ky ligj hyn në fuqi 15 ditë pas botimit në “Fletoren zyrtare” dhe fillon të zbatohet sipas afateve të përcaktuara në ligjin për faturën dhe sistemin e monitorimit të qarkullimit.

K R Y E T A R I

GRAMOZ RUÇI